

# PROPRIUM MISSARUM

CIVITATIS ET ARCHIDIOECESIS

## UTINENSIS



UTINI

TYPIS "ARTI GRAFICHE FRIULANE..

1954

# UTINEN.

**P**raesens Kalendarium, juxta Rubricas et Decreta novissima redactum, S. Rituum Congregatio, vigore facultatum sibi specialiter a Ss.<sup>mo</sup> D. N. Pio Papa X tributarum, revisione rite peracta, recognovit ac probavit, illudque in universa Archidioecesi Utinensi adhiberi mandavit: servatis de cetero Rubrici et Decretis, praesertim quoad Festa Dedicationis et Titularis Ecclesiarum nec non Patronorum cujusque loci. Contrariis non obstantibus quibuscumque.

*Die 5 Januari 1914.*

† PETRUS LA FONTAINE Ep. Charyst. Secret.  
PHILIPPUS DI FAVA Substit.

[L. S.]

• o o •

## CURIA ARCHIEPISCOPALIS UTINENSIS

IMPRIMATUR. Omnia enim concordant cum  
probatis editionibus.

*Utini die 15 Septembris 1954.*

† JOSEPHUS Archiep. Utinen.

[L. S.]

Can. DOMINICUS GARLATTI  
Cancellarius

Quae iura a lege sunt, Curia Archiepiscopalis Utinensis sibi reservat.

*Utini, die 16 Septembris 1954.*

Can. OLIVUS COMELLI  
Vicarius Generalis

# PROPRIUM MISSARUM ARCHIDIECESIS UTINENSIS

Die 2 Januarii

S. ZOILI

*Confessoris*

Missa Os justi, de Comuni  
Conf. non Pontif.

Et fit. Commem. Octavae S. Ste-  
phani Protom. ut in Missali hac die.

Die 14 Januarii

B. ODORICI

A PORTUNAONE

Introitus. Gen. 12. 1.

Egrede de terra tua, et  
de domo patris tui, et  
veni in terram, quam mon-  
strabo tibi. (T. P. Alleluja,  
alleluia).

Psal. 116. Laudate Domi-  
num, omnes gentes: laudate  
eum, omnes populi.

ψ. Gloria Patri, etc.

Oratio.

Deus, qui ad multos Orien-  
tis populos in Ecclesiae  
sinum perducendos, Beatum  
Odoricum invicta animi for-  
titudine et constantia robo-  
rasti: concede propitius; ut  
infidelium animae, diabolica  
fraude deceptae, ipsius me-  
ritis gloriosis a suis tenebris  
eruantur. Per Dominum.

Et fit Commem. S. Hilarii Ep.  
Conf. et Eccl. Doct.

Oratio.

Deus, qui populo tuo ae-  
ternae salutis beatum  
Hilarium ministrum tribuisti:  
praesta, quaesumus; ut, quem  
Doctorem vitae habuimus in  
terris, intercessorem habere  
mereamur in caelis. Per Do-  
minum.

Deinde fit Commem. S. Felicis  
Presb. et Mart.

## Oratio.

Concede, quaesumus, omnipotens Deus: ut ad meliorem vitam Sanctorum tuorum exempla nos provocent; quatenus, quorum solemnities agimus, etiam actus imitemur. Per Dominum.

Lectio Epistolae beati Pauli Apostoli ad Thessalonicenses.

1. Thess. 2. (2-9).

Fratres: Fiduciam habuimus in Deo nostro, loqui ad vos Evangelium Dei in multa sollicitudine. Exhortatio enim nostra non de errore, neque de immunditia, neque in dolo, sed sicut probati sumus a Deo, ut crederetur nobis Evangelium: ita loquimur, non quasi hominibus placentes, sed Deo, qui probat corda nostra. Neque enim aliquando fuimus in sermone adulationis, sicut scitis: neque in occasione avaritiae: Deus testis est: nec quaerentes ab hominibus gloriam, neque a vobis, neque ab aliis: cum possemus vobis oneri

esse ut Christi Apostoli: sed facti sumus parvuli in medio vestrum, tamquam si nutrix foveat filios suos. Ita desiderantes vos, cupide volebamus tradere vobis non solum Evangelium Dei, sed etiam animas nostras; quoniam carissimi nobis facti estis. Memores enim estis, fratres, laboris nostri et fatigationis: nocte ac die operantes, ne quem vestrum gravaremus, praedicavimus in vobis Evangelium Dei.

Graduale. Luc. 4. 18. Evangelizare pauperibus misit me, sanare contritos corde.

Ps. 72. 28. Mihi autem adhaerere Deo bonum est: ponere in Domino Deo spem meam.

Alleluja, alleluja.

Ps. Isai. 52. 7. Quam pulchri super montes pedes annuntiantis, et praedicantis pacem: annuntiantis bonum, praedicantis salutem, dicentis Sion: Regnabit Deus tuus! Alleluja.

In Missis post Septuagesimam, omissis Alleluja et versu sequenti, dicitur:

Tractus. Psal. 95. 3. 5.  
Annuntiate inter gentes gloriam Domini in omnibus populis mirabilia ejus.

℣. Quoniam magnus Dominus, et laudabilis nimis: terribilis est super omnes deos.

℣. Quoniam omnes dii gentium daemonia: Dominus autem caelos fecit.

Tempore Paschali, omissis Graduali et Tractu, dicitur:

Alleluja, alleluja.

℣. Isai. 52. 7. Quam pulchri super montes pedes annuntiantis, et praedicantis pacem: annuntiantis bonum, praedicantis salutem. Alleluja.

℣. Eccli. 46. 6. Invocavit Altissimum potentem in oppugnando inimicos undique: et audivit illum magnus et sanctus Deus. Alleluja.

✠ Sequentia sancti Evangelii secundum Matthaeum.

Matt. 9. 35-38.

In illo tempore: Circuibat Jesus omnes civitates, et castella, docens in synagogis eorum, et praedicans Evangelium regni, et curans omnem infirmitatem. Videns autem turbas, misertus est eis; quia erant vexati, et jacentes sicut oves non habentes pastorem. Tunc dicit discipulis suis: Messis quidem multa, operarii autem pauci. Rogate ergo dominum messis, ut mittat operarios in messem suam.

Offertorium. Psal. 66. 6-7. Confiteantur tibi populi omnes, et metuant eum omnes fines terrae. (T. P. Alleluja).

Secreta,

Pro christiana fidei triumpho, oblationem mundam salutaris hostiae, tibi offerimus, Domine: et praesta; ut intercedente Beato Odorico Confessore tuo, ubique gentium jugiter offeratur. Per Dominum.

Pro S. Hilario.

Sancti Hilarii Pontificis tui atque Doctoris nobis, Do-

mine, pia non desit oratio: quae et munera nostra conciliet, et tuam nobis indulgentia semper obtineat. Per Dominum.

Pro S. Felice.

**H**ostias tibi, Domine, beati Felicis Martyris tui dicatas meritis, benignus assume: et ad perpetuum nobis tribue provenire subsidium. Per Dominum.

Communio. 1. Cor. 1. 21. Placuit Deo per stultitiam praedicationis salvos facere credentes. (T. P. Alleluia).

Postcommunio.

**V**itali sacramento refecti, clementiam tuam, Domine, humiliter deprecamur: ut Beati Odorici meritis et intercessione, ad lucem, quae Christus est, infideles universi perducantur. Per eundem Dominum.

Pro S. Hilario.

**U**t nobis, Domine, tua sacrificia dent salutem: beatus Hilarius Pontifex tuus

et Doctor egregius, quaesumus, precator accedat. Per Dominum.

Pro S. Felice.

**Q**uaesumus, Domine, salutaribus repleti mysteriis: ut, beati Felicis Martyris tui, cujus solemnia celebramus, orationibus adjuvemur. Per Dominum.

Die 19 Januarii

S. PAULINI

*Patriarchae Aquil. Confessoris.*

Missa Statuit, de Communi Conf. Pontif.

Oratio.

**D**a, quaesumus, omnipotens Deus: ut beati Paulini Confessoris tui atque Pontificis veneranda solemnitas, et devotionem nobis augeat et salutem. Per Dominum.

Et fit Commem. Ss. Marii et Soc. Mm.

Oratio.

**E**xaudi, Domine, populum tuum cum Sanctorum tuorum patrocinio supplican-

tem: ut et temporalis vitae nos tribuas pace gaudere; et aeternae reperire subsidium. Per Dominum.

Deinde fit Commem. S. Canuti Regis et Martyris.

Oratio.

**D**eus, qui ad illustrandam Ecclesiam tuam beatum Canutum regem martyrii palma et gloriosis miraculis decorare dignatus es: concede propitius; ut, sicut ipse Dominicae passionis imitator fuit, ita nos per ejus vestigia gradientes, ad gaudia semaiterna pervenire mereamur. Per eundem Dominum.

Secreta.

**S**ancti tui, quaesumus, Domine, nos ubique laetificent: ut, dum eorum merita recolimus, patrocinia sentiamus. Per Dominum.

Pro Ss. Mm.

**P**reces, Domine, tuorum respice, oblationesque fidelium; ut et tibi gratae sint pro tuorum festivitate Sanctorum, et nobis conferant

tuae propitiationis auxilium. Per Dominum.

Pro S. Canuto.

**A**cepta sit in conspectu tuo, Domine, nostra devotio: et ejus nobis fiat supplicatione salutaris, pro cujus solemnitate defertur. Per Dominum.

Postcommunio.

**P**raesta, quaesumus, omnipotens Deus: ut, de perceptis muneribus gratias exhibentes, intercedente beato Paulino Confessore tuo atque Pontifice, beneficia potiora sumamus. Per Dominum.

Pro Ss. Mm.

**S**anctorum tuorum, Domine, intercessione placatus: praesta, quaesumus; ut, quae temporali celebramus actione, perpetua salvatione capiamus. Per Dominum.

Pro S. Canuto.

**R**efecti participatione muneris sacri, quaesumus, Domine Deus noster: ut,

cujus exsequimur cultum, intercedente beato Canuto Martyre tuo, sentiamus effectum. Per Dominum.

**Die 8 Februarii**

**S. JUVENTII**

*Episcopi Confessoris.*

*Missa Statuit, de Communi Conf. Pontif.*

*Oratio.*

**A**djuvet familiam tuam quaesumus, Domine, sancti Confessoris tui atque Episcopi Juventii intercessio gloriosa, ut pius exorator evadat, qui tui nominis egregius extitit praedicator. Qui vivis.

*Et fit Commem. S. Joannis de Matha Conf.*

*Oratio.*

**D**eus, qui per sanctum Joannem ordinem sanctissimae Trinitatis ad redimendum de potestate Sarcenorum captivos caelitus instituere dignatus es: praesta, quaesumus; ut, ejus suf-

fragantibus meritis, a captivitate corporis et animae, te adjuvante, liberemur. Per Dominum.

*Si Festum venerit post fer. IV Ciner. fit Commem. Feriae.*

*Secreta.*

**S**ancti tui, quaesumus, Domine, nos ubique laetificent: ut, dum eorum merita recolimus, patrocinia sentiamus. Per Dominum.

*Pro S. Joanne.*

**L**audis tibi, Domine, hostias immolamus in tuorum commemoratione Sanctorum: quibus nos et praesentibus exui malis confidimus, et futuris. Per Dominum.

*Si Festum venerit ut supra, fit Commem. Feriae.*

*Postcommunio.*

**P**raesta, quaesumus, omnipotens Deus: ut, de perceptis muneribus gratias exhibentes, intercedente beato Juventio Confessore tuo atque Pontifice, beneficia potiora sumamus. Per Dominum.

Pro S. Joanne.

**R**efecti cibo potuque caelesti, Deus noster, te supplices exoramus: ut in cuius haec commemoratione percepimus, ejus muniamur et precibus. Per Dominum.

Si Festum venerit ut supra, fit Commem. Ferae ejusque Evangelium leg. in fine.

**Die 3 Martii**  
**S. ANSELMI**

*Abbatis.*

Missa Os justi, de Communi Abbatum. Et fit Commemor. Ferae ejusque Evangelium leg. in fine, si Festum venerit in Quadrag.

**Die 16 Martii**

**Ss. HILARII** *Episc. et*  
**TATIANI** *Diac. Martyrum.*

Missa Intret, de Communi plurimorum Martyrum com Orat. sequent.

Oratio.

**B**eatorum Martyrum Hilarii Episcopi et Tatiani Diaconi nos, quaesumus, Domine, festa tueantur: et eorum

commendet oratio veneranda.  
Per Dominum.

Et fit Commem. Ferae.

Secreta.

**A**desto, Domine, supplicationibus nostris, quas in Sanctorum tuorum commemoratione deferimus: ut, qui nostrae justitiae fiduciam non habemus, eorum qui tibi placuerunt, meritis adjuvemur.

Et fit Commem. Ferae.

Postcommunio.

**Q**uaesumus, Domine, salutaribus repleti mysteriis: ut, quorum solemnia celebramus, eorum orationibus adjuvemur. Per Dominum.

Et fit Commem. Ferae ejusque Evang. leg. in fine.

**Die 25 Martii**

**IN ANNUNTIATIONE**  
**B. MARIAE V.**

S. Metropolitanæ Ecclesiae Utinensis  
Titularis

Missa ut in Missali sub hac die, et celebratur sine Octava in Quadrag.

Die 1 Aprilis  
IN OCTAVA  
ANNUNTIATIONIS

(Extra Quadragesimam)

Missa ut in Festo, servato Tem-  
poris ritu.

Die 18 Aprilis  
IN DEDICATIONE  
S. METROPOLITANÆ  
ECCLESIAE UTINENSIS

Celebratur cum Octava in Uni-  
versa Archidioecesi. Credo p. tot.  
Oct.

Missa Terribilis est, de Com-  
muni Dedicationis Ecclesiae.

Die 23 Aprilis  
B. HELENÆ  
DE VALENTINIS *Viduae.*

Missa Cognovi, de Communi  
nec Virg. nec Mm. praeter Ora-  
tiones seq.

Oratio.

**D**eus, qui beatam Helenam  
tuo amore succensam  
jugi mortificatione mirabilem  
effecisti: ejus nobis exemplo  
et intercessione concede; ut,

dignos poenitentiae fructus  
facere, et te semper diligere  
valeamus. Per Dominum.

Et fit Commem. S. Georgii M.

Oratio.

**D**eus, qui nos beati Georgii  
Martyris tui meritis et  
intercessione laetificas: con-  
cede propitius; ut, qui tua  
per eum beneficia poscimus,  
dono tuae gratiae consequamur.  
Per Dominum.

Pro Octava Dedicationis.

Oratio.

**D**eus, qui nobis per sing-  
ulos annos huius sancti  
templi tui consecrationis re-  
paras diem, et sacris semper  
misteriis raepresentas incolu-  
mes: exaudi preces populi  
tui et praesta; ut, quisquis  
hoc templum beneficia peti-  
turus ingreditur, cuncta se  
impetrasse laetetur. Per Do-  
minum.

Secreta.

**S**uscipe, clementissime Deus,  
sacrificium in honorem  
beatae Helenae majestati tuae  
oblatum, atque, ejus meritis

et exemplo, gratum tibi cor nostrum sit jugiter holocaustum. Per Dominum.

Pro S. Georgio.

**M**unera, Domine, oblata sanctifica, et, intercedente beato Georgio Martyre tuo, nos per haec a peccatorum nostrorum maculis emunda. Per Dominum.

Pro Octava Dedicacionis  
(Extra ecclesiam dedicatam omit-  
titur (.).)

**A**nnue, quaesumus, Domine precibus nostris: (ut quicumque intra templi huius, cuius anniversarium dedicacionis diem celebramus, ambitum continemur, plena tibi atque perfecta corporis et animae devotione placeamus;) ut, dum haec vota praesentia reddimus, ad aeterna praemia, te adiuvante, pervenire mereamur. Per Dominum.

Postcommunio.

**C**aelestibus, Domine, pasti deliciis te supplices exoramus; ut, intercedente beata

Helena, doceas nos terrena despiciere, et amare caelestia.

Pro S. Georgio.

**S**upplices te rogamus, omnipotens Deus: ut, quos tuis reficis sacramentis, intercedente beato Georgio Martyre tuo, tibi etiam placitis moribus dignanter tribuas deservire. Per Dominum.

Pro Octava Dedicacionis

**D**eus, qui de vivis et electis lapidibus aeternum maiestati tuae praeparas habitaculum: auxiliare populo tuo supplicanti; ut, quod Ecclesiae tuae corporalibus proficit spatium, spiritualibus amplificetur augmentis. Per Dominum.

---

**Die 25 Aprilis  
IN OCTAVA  
DEDICATIONIS ECCL.  
METROP.**

Fit tantum Commem. de ea in  
Missa S. Marci Evang

---

## Die 1 Junii

Ss. CANTIANI, CANTII,  
CANTIANILLÆ  
ac PROTI

*Martyrum.*

*Extra Tempus Pasch.*

Introitus. Eccl. 44, 15 et 14.

Sapientiam sanctorum narrent populi, et laudes eorum nuntiet ecclesia: nomina autem eorum vivent in saeculum saeculi.

Psal. 32, 1. Exsultate, justi, in Domino: rectos decet colaudatio.

ψ. Gloria Patri.

Oratio.

Praesta, quaesumus, omnipotens Deus: ut populus tuus ad plenae devotionis affectum beatorum Martyrum Cantiani et Sociorum ejus natalitiis praeparetur: et, eorum patrociniis promerente, beatæ capiat securitatis augmentum. Per Dominum.

Et fit Commem. S. Angelæ Mericæ Virg.

Oratio.

Deus, qui novum per beatam Angelam sacrarum

Virginum collegium in Ecclesia tua florescere voluisti: da nobis, ejus intercessione, angelicis moribus vivere; ut, terrenis omnibus abdicatis, gaudiis perfrui mereamur aeternis. Per Dominum.

Deinde fit Commem. S. Petronillæ Virg.

Oratio.

Exaudi nos, Deus salutaris noster: ut, sicut de beatæ Petronillæ Virginis tuæ festivitate gaudemus; ita piæ devotionis erudiamur affectu. Per Dominum.

Lectio libri Sapientiae.

Sap. 5, 16-20.

Justi autem in perpetuum vivent, et apud Dominum est merces eorum, et cogitatio illorum apud Altissimum. Ideo accipient regnum decoris, et diadema speciei de manu Domini: quoniam dextera sua teget eos, et brachio sancto suo defendet illos. Accipiet armaturam zelus illius, et armabit creaturam ad ultionem inimicorum. Induet

pro thorace justitiam, et accipiet pro galea iudicium certum. Sumet scutum inexpugnabile, aequitatem.

Graduale. Ps. 123, 7-8.

Anima nostra, sicut passer, erepta est de laqueo venantium.

☩ Laqueus contritus est, et nos liberati sumus: adiutorium nostrum in nomine Domini, qui fecit caelum et terram.

Alleluja, alleluja.

☩. Haec est vera fraternitas, quae vicit mundi crimina: Christum secuta est inclyta tenens regna caelestia. Alleluja.

✠ Sequentia sancti Evangelii secundum Lucam.  
Luc. 6, 17-23.

In illo tempore: Descendens Iesus de monte, stetit in loco campestri, et turba discipulorum ejus, et multitudo copiosa plebis ab omni Iudaea, et Jerusalem, et maritima, et Tyri, et Sidonis, qui venerant ut audirent eum, et

sanarentur a languoribus suis. Et qui vexabantur a spiritibus immundis, curabantur. Et omnis turba quaerebat eum tangere: quia virtus de illo exibat, et sanabat omnes. Et ipse elevatis oculis in discipulos suos, dicebat: Beati pauperes: quia vestrum est regnum Dei. Beati, qui nunc esuritis: quia saturabimini. Beati, qui nunc fletis: quia ridebitis. Beati eritis, cum vos oderint homines, et cum separaverint vos, et exprobraverint, et ejecerint nomen vestrum tamquam malum propter Filium hominis. Gaudete in illa die, et exsultate: ecce enim merces vestra multa est in caelo.

Offertorium. Psal. 149, 5-6.  
Exsultabunt sancti in gloria, laetabuntur in cubilibus suis: exaltationes Dei in faucibus eorum, alleluja.

Secreta.

Munera tibi, Domine, nostrae devotionis offerimus: quae et pro tuorum

tibi grata sint honore justorum, et nobis salutaria, te miserante, reddantur. Per Dominum.

Pro S. Angela.

**H**ostia, Domine, quam tibi beatae Angelae memoriam recolentes offerimus, et nostrae pravitatis veniam imploret, et gratiae tuae nobis dona conciliet. Per Dominum

Pro S. Petronilla.

**A**cepta tibi sit, Domine, sacratae plebis oblatio pro tuorum honore Sanctorum: quorum se meritis de tribulatione percepisse cognoscit auxilium. Per Dominum.

Communio. Luc. 12, 4.  
Dico autem vobis amicis meis:  
Ne terreamini ab his, qui vos  
persequuntur.

Postcommunio.

**P**raesta nobis, quaesumus, Domine: intercedentibus sanctis Martyribus tuis Cantiano et Sociis ejus; ut, quod ore contingimus, pura mente capiamus. Per Dominum.

Pro S. Angela.

**C**aelesti alimonia refecti, supplices te, Domine, deprecamur: ut beatae Angelae precibus et exemplo, ab omni labe mundati, et corpore tibi placeamus, et mente. Per Dominum.

Pro S. Petronilla.

**S**atiasti, Domine, familiam tuam muneribus sacris: ejus, quaesumus, semper interventione nos refove, cujus solemnia celebramus. Per Dominum.

Tempore Paschali.

Missa Sancti tui de Communi  
Mm. cum Orat. Praesta, quaesumus  
ut supra.

Die 6 Junii

B. BERTRANDI

*Patr. Aquil. Confessoris.*

Missa Sacerdotes tui, de Communi Conf. Pont. praeter Orationes seq.

Oratio.

**D**eus, qui beatum Bertrandum pro Ecclesiae suae juribus ad mortem usque cer-

tantem invicta pastoralis fortitudine roborasti: praesta fidelibus tuis; ut ad pietatis et religionis constantiam ejusdem informentur exemplis. Per Dominum.

Et fit. Commem. S. Norberti Ep. et Conf.

Oratio.

**D**eus, qui beatum Norbertum Confessorem tuum, atque Pontificem, verbi tui praeconem eximium effecisti, et per eum Ecclesiam tuam nova prole foecundasti: praesta, quaesumus; ut, ejusdem suffragantibus meritis, quod ore simul et opere docuit, te adjuvante, exercere valeamus. Per Dominum.

In Ecclesia Metropol. dicitur Credo.

Secreta.

**S**acra dona, quae tibi, Domine, reverenter offerimus in commemoratione beati Bertrandi, Ecclesiae tuae libertatem tueantur, et pacem et sanctificationis nostrae incrementa promoveant. Per Dominum.

Pro S. Norberto.

**S**ancti tui, quaesumus, Domine, nos ubique laetificent: ut, dum eorum merita recolimus, patrocinia sentiamus. Per Dominum.

Postcommunio.

**P**raesta, quaesumus, omnipotens Deus, ut in honorem beati Bertrandi celebrata mysteria ejus virtutum imitatores, et tua protectione nos dignos efficiant. Per Dominum.

Pro S. Norberto.

**P**raesta, quaesumus, omnipotens Deus: ut, de perceptis muneribus gratias exhibentes, intercedente beato Norberto Confessore tuo atque Pontifice, beneficia potiora sumamus. Per Dominum.

Die 15 Junii

Ss. FELICIS

et FORTUNATI *Martyrum.*

**S**alus autem justorum a Domino: et protector eorum

est in tempore tribulationis.

Psal. ibid. 1. Noli aemulari in malignantibus: neque zelaveris facientes iniquitatem.

℣. Gloria Patri.

Oratio.

**A**desto, quaesumus, Domine, fidelibus tuis, nec ullis mentis et corporis sinas subjacere periculis, quos beatorum Martyrum tuorum Felicis et Fortunati munit gloriosa confessio. Per Dominum.

Et fit Commem. Sa. Viti et Soc. Mm.

Oratio.

**D**a Ecclesiae tuae, quaesumus, Domine, sanctis Martyribus tuis Vito, Modesto atque Crescentia intercedentibus, superbe non sapere, sed tibi placita humilitate proficere: ut, prava despiciens, quaecumque recta sunt libera exerceat caritate. Per Dominum.

Lectio Epistolae beati Pauli Apostoli ad Hebraeos.

Hebr. 10, 32-38.

**F**ratres: Rememoramini pristinos dies, in quibus illuminati, magnum certamen sustinuistis passionum: et in altero quidem opprobriis, et tribulationibus spectaculum facti: in altero autem socii taliter conversantium effecti. Nam et vinctis compassi estis, et rapinam bonorum vestrorum cum gaudio suscepistis, cognoscentes vos habere meliorem, et manentem substantiam. Nolite itaque amittere confidentiam vestram, quae magnam habet remunerationem. Patientia enim vobis necessaria est: ut voluntatem Dei facientes, reportetis promissionem. Adhuc enim modicum aliquantulum, qui venturus est, veniet, et non tardabit. Justus autem meus ex fide vivit.

Graduale. Psal. 33, 18-19  
Clamaverunt justi, et Dominus exaudivit eos: et ex omnibus tribulationibus eorum liberavit eos.

℣. Juxta est Dominus his,

qui tribulatu sunt corde: et humiles spiritu salvabit.

Alleluja, alleluja.

Ÿ. Haec est vera fraternitas, quae vicit mundi crimina: Christum secuta est inclita tenens regna caelestia. Alleluja.

✠ Sequentia sancti Evangelii secundum Lucam  
Luc. 10, 16 - 20.

In illo tempore: Dixit Jesus discipulis suis: Qui vos audit, me audit: et qui vos spernit, me spernit. Qui autem me spernit, spernit eum, qui misit me. Reversi sunt autem septuaginta cum gaudio, dicentes: Domine, etiam daemonia subjiciuntur nobis in nomine tuo. Et ait illis: Videbant satanam sicut fulgur de caelo cadentem. Ecce dedi vobis potestatem calcandi supra serpentes et scorpiones, et super omnem virtutem inimici: et nihil vobis nocebit. Verumtamen in hoc nolite gaudere, quia spiritus vobis subjiciuntur: gaudete

autem, quod nomina vestra scripta sunt in caelis.

Offertorium. Sap., 3, 1, 2 et 3. Justorum animae in manu Dei sunt, et non tanget illos tormentum malitiae: visi sunt oculis insipientium mori: illi autem sunt in pace, alleluja.

Secreta.

Hostias Domine, quas nomini tuo sacrandas offerimus, sanctorum Martyrum tuorum Felicis et Fortunati prosequatur oratio, per quam nobis expiari tribuas, et defendi. Per Dominum.

Pro Ss. Mm. Vito et Soc.

Sicut gloriam divinae potentiae munera pro Sanctis oblata testantur: sic nobis effectum, Domine, tuae salvationis impendant. Per Dominum.

Communio. Matt. 10, 27. Quod dico vobis in tenebris, dicite in lumine, dicit Dominus: et quod in aure auditis, praedicate super tecta.

Postcommunio.

**R**ecreati sacris muneribus, quaesumus, Domine, ut non indigne sumentibus non vertantur ad poenam, sed, intercedentibus sanctis Martyribus tuis Felice et Fortunato, fidelibus prosint ad veniam. Per Dominum.

Pro Ss. Mm. Vito et Soc.

**R**epleti, Domine, benedictione sollemni: quaesumus, ut per intercessionem sanctorum Martyrum tuorum Viti, Modesti et Crescentiae, medicina sacramenti et corporibus nostris prosit, et mentibus. Per Dominum.

**Die 17 Junii**

**Ss. CYRIACAE  
et MUSCAE**

*Virginum et Martyrum.*

Introitus. Ps. 17, 31.

**D**eus meus, impolluta via ejus; eloquia Domini igne examinata: protector est omnium sperantium in se.

Ps. ibid., 2-3. Diligam te,

Domine, fortitudo mea: Dominus firmamentum meum, et refugium meum, et liberator meus.

V. Gloria Patri.

Oratio.

**D**a nobis, quaesumus, Domine Deus noster, beatarum Cyriacae et Muscae Virginum et Martyrum tuarum palmas incessabili devotione venerari: ut, quas dignamente celebrare non possumus, humilibus saltem frequentemus obsequiis. Per Dominum.

Lectio Epistolae Beati Pauli Apostoli ad Corinthios.

2 Cor. 4, 6-21 et 16-17.

**F**ratres: Deus illuxit in cordibus nostris ad illuminationem scientiae claritatis Dei, in facie Christi Jesu. Habemus autem thesaurum istum in vasis fictilibus: ut sublimitas sit virtutis Dei, et non ex nobis. In omnibus tribulationem patimur, sed non angustiamur: aporiamur,

sed non destituimur: persecutionem patimur, sed non derelinquimur: dejicimur, sed non perimus: semper mortificationem Jesu in corpore nostro circumferentes, ut et vita Jesu manifestetur in corporibus nostris. Semper enim nos, qui vivimus, in mortem tradimur propter Jesum: ut et vita Jesu manifestetur in carne nostra mortali. Propter quod non deficimus: sed licet is qui foris est, noster homo corrumpatur, tamen is qui intus est, renovatur de die in diem. Id enim, quod in praesenti est momentaneum et leve tribulationis nostrae, supra modum in sublimitate aeternum gloriae pondus operatur in nobis.

Graduale. Ps. 43, 8-9. Salvasti enim nos, Deus, de affligentibus nos: et odientes nos confudisti.

Ÿ. In Deo laudabimur tota die: et in nomine tuo confitebimur in saeculum.

Alleluja, alleluja.

Ÿ. Apoc. 12, 11. Vicerunt draconem propter sanguinem Agni, et propter verbum testimonii sui. Alleluja.

✠ Sequentia sancti Evangelii secundum Matthaeum.

Matth. 25, 1-13.

In illo tempore: Dixit Jesus discipulis suis parabolam hanc: Simile erit regnum caelorum decem virginibus: quae accipientes lampades suas exierunt obviam sponso et sponsae. Quinque autem ex eis erant fatuae, et quinque prudentes: sed quinque fatuae, acceptis lampadibus, non sumpserunt oleum secum: prudentes vero acceperunt oleum in vasis suis cum lampadibus. Moram autem faciente sponso, dormitaverunt omnes et dormierunt. Media autem nocte clamor factus est: Ecce sponsus venit, exite obviam ei. Tunc surrexerunt omnes virgines illae, et ornaverunt lampades suas. Fatuae autem sapientibus dixerunt: Date nobis de oleo

vestro, quia lampades nostrae exstinguuntur. Responderunt prudentes, dicentes: Ne forte non sufficiat nobis et vobis, ite potius ad vendentes et emite vobis. Dum autem irent emere, venit sponsus: et quae paratae erant, intraverunt cum eo ad nuptias, et clausa est janua. Novissime vero veniunt et reliquae virgines, dicentes: Domine, domine, aperi nobis. At ille respondens ait: Amen dico vobis, nescio vos. Vigilate itaque, quia nescitis diem neque horam.

Offertorium. Ps. 88, 16-17. Domine, in lumine vultus tui ambulabunt, et in nomine tuo exsultabunt tota die: et in justitia tua exaltabuntur.

### Secreta.

**I**ntende, quaesumus, Domine, munera altaribus tuis pro beatorum Virginum et Martyrum tuarum Cyriacae et Muscae honore proposita: ut, sicut per haec sacra mysteria illis gloriam contulisti,

ita nobis indulgentiam largiaris. Per Dominum.

Communio. Matth. 25, 4 et 6. Prudentes virgines acceperunt oleum in vasis suis cum lampadibus: media autem nocte clamor factus est: Ecce sponsus venit, exite obviam ei.

### Postcommunio.

**P**raesta nobis, quaesumus, Domine, intercedentibus beatis Virginibus et Martyribus tuis Cyriaca et Musca, ut, quod ore contingimus, pura mente capiamus. Per Dominum.

## Die 22 Junii

## S. NICETAE

*Episcopi Confessoris.*

Missa Sacerdotes tui, de Comuni Confessoris Pontificis.

### Oratio.

**E**xaudi, quaesumus, Domine, preces nostras, quas in beati Nicetae Confessoris tui atque Pontificis solemnitate deferimus: et, qui tibi digne meruit famulari, ejus intercedentibus meritis,

ab omnibus nos absolve peccatis. Per Dominum.

Et fit *commem. S. Paulini Episc. Conf.*

### Oratio.

**D**eus, qui omnia pro te in hoc saeculo relinquentibus, centuplum in futuro et vitam aeternam promisisti: concede propitius; ut, sancti Pontificis Paulini vestigiis inhaerentes, valeamus terrena despiciere, et sola caelestia desiderare: Qui vivis et regnas.

### Secreta.

**S**ancti Nicetae Confessoris tui atque Pontificis, quaesumus, Domine, annua solemnitas pietati tuae nos reddat acceptos: ut, per haec pia placationis officia, et illum beata retributio committetur, et nobis gratiae tuae dona conciliet. Per Dominum.

### Pro S. Paulino.

**D**a nobis, Domine, perfectae caritatis sacrificium, exemplo sancti Pontificis Paulini, cum altaris

oblacione conjungere: et beneficentiae studio sempiternam misericordiam promereri. Per Dominum.

### Postcommunio.

**D**eus, fidelium remunerator animarum: praesta; ut beati Nicetae Confessoris tui atque Pontificis, cujus venerandam celebramus festivitatem, precibus indulgentiam consequamur. Per Dominum.

### Pro S. Paulino.

**T**ribue nobis per haec sancta, Domine, illum pietatis et humilitatis affectum, quem ex hoc divino fonte hausit sanctus Pontifex tuus Paulinus: et, ipsius intercessione, in omnes, qui te deprecantur, gratiae tuae divitias benignus effunde. Per Dominum.

## Die 3 Julii

### S. HELIODORI

*Episcop. Confessoris.*

*Missa Statuit, de Communi Conf. Pont.*

## Oratio.

**D**a, quaesumus, omnipotens Deus: ut beati Heliodori Confessoris tui atque Pontificis veneranda solemnitas, et devotionem nobis augeat, et salutem. Per Dominum.

Et fit Commem. S. Leonis II Pp. et Conf.

## Oratio.

**G**regem tuum, Pastor aeternae, placatus intende: et per beatum Leonem Summum Pontificem, perpetua protectione custodi; quem totius Ecclesiae praestitisti esse pastorem. Per Dominum.

Deinde Commem. Octavae Ss. App. Petri et Pauli.

## Oratio.

**D**eus, qui hodiernam diem Apostolorum tuorum Petri et Pauli martyrio consecrasti: da Ecclesiae tuae, eorum in omnibus sequi praeceptum: per quos religionis sumpsit exordium. Per Dominum.

## Secreta.

**S**ancti tui, quaesumus, Domine, nos ubique laetificent: ut, dum eorum merita recolimus, patrocinia sentiamus. Per Dominum.

## Pro S. Leone.

**O**blatis muneribus, quaesumus Domine, Ecclesiam tuam benignus illustra: ut, et gregis tui proficiat ubique successus, et grati fiant nomini tuo, te gubernante, pastores. Per Dominum.

## Pro Octava Ss. App.

**H**ostias, Domine, quas nomini tuo sacrandas offerimus, apostolica prosequatur oratio; per quam nos expiari tribuas, et defendi. Per Dominum.

## Postcommunio.

**P**raesta, quaesumus, omnipotens Deus: ut, de perceptis muneribus gratias exhibentes, intercedente beato Heliodoro Confessore tuo atque Pontifice, beneficia potiora sumamus. Per Dominum.

Pro S. Leone.

**R**efectione sancta enutritam gubernas, quaesumus Domine, tuam placatus Ecclesiam: ut potenti moderatione directa, et incrementa libertatis accipiat et in religionis integritate persistat. Per Dominum.

Pro Octava Ss. App.

**Q**uos caelesti, Domine, alimento satiasti: apostolicis intercessionibus ab omni adversitate custodi. Per Dominum.

In fine dicitur Evang. Missae infra Octav. Ss. App. ut in Missali hac die.

Die 12 Julii

**Ss. HERMAGORAE** *Præcepiscopi Aquilejensis*  
*et* **FORTUNATI** *Diac. Mm.*

S. Metropolit. Ecclesiae et Archidioec. Utinensis Patronorum.

Celebr. cum Octava in universa Archidioecesi.

Introitus. Psal. 78, 11, 12, et 10

**I**ntret in conspectu tuo, Domine, gemitus compeditorum: redde vicinis nostris septuplum in sinu eorum: vindica sanguinem sanctorum tuorum, qui effusus est.

Psal. ibid. 1. Deus, venerunt gentes in hereditatem tuam: polluerunt templum sanctum tuum: posuerunt

Jerusalem in pomorum custodiam.

ψ. Gloria Patri.

Oratio.

**D**eus, qui nos hodierna die beatorum Martyrum tuorum Hermagorae et Fortunati multiplici facis celebritate gaudere: tribue, quaesumus eorum nos semper piis defensionibus muniri, et orationibus adiuvari. Per Dominum.

In Missis privatis tantum fit Commem. S. Joannis Gualberti Abb.

### Oratio.

Intercessio nos, quaesumus, Domine, beati Joannis Abbatis commendet: ut, quod nostris meritis non valemus, eius patrocinio assequarum. Per Dominum.

### Lectio libri Sapientiae.

Sap. 3, 1 - 8.

Justorum animae in manu Dei sunt, et non tanget illos tormentum mortis. Visi sunt oculis insipientium mori: et aestimata est afflictio exitus illorum: et quod a nobis est iter, exterminium: illi autem sunt in pace. Et si coram hominibus tormenta passi sunt, spes illorum immortalitate plena est. In paucis vexati, in multis bene disponentur: quoniam Deus tentavit eos, et invenit illos dignos se. Tamquam aurum in fornace probavit illos, et quasi holocausti hostiam accepit illos et in tempore erit respectus illorum. Fulgebunt

justi, et tamquam scintillae in arundinetis discurrent. Judicabunt nationes, et dominabuntur populis, et regnabit Dominus illorum in perpetuum.

Graduale. Exodi 15, 11. Gloriosus Deus in sanctis suis: mirabilis in maiestate, faciens prodigia.

Ÿ. Ibid 6. Dexterata tua, Domine, glorificata est in virtute: dextera manus tua confregit inimicos.

Alleluja, alleluja.

Ÿ. Eccli. 44, 14. Corpora sanctorum in pace sepulta sunt, et nomina eorum vivent in generationem et generationem. Alleluja.

✠ Sequentia sancti Evangelii secundum Lucam.

Luc. 21. 9 - 19

In illo tempore: Dixit Jesus discipulis suis: Cum audieritis praelia et seditiones, nolite terri: oportet primum haec fieri, sed nondum statim finis. Tunc dicebat illis:

Surget gens contra gentem, et regnum adversus regnum. Et terraemotus magni erunt per loca, et pestilentiae, et fames, terroresque de caelo, et signa magna erunt. Sed ante haec omnia injicient vobis manus suas, et persequentur, tradentes in synagogas et custodias, trahentes ad reges et praesides propter nomen meum: continget autem vobis in testimonium. Ponite ergo in cordibus vestris non praemeditari quemadmodum respondeatis. Ego enim dabo vobis os, et sapientiam, cui non poterunt resistere, et contradicere omnes adversarii vestri. Tradimini autem a parentibus, et fratribus, et cognatis, et amicis, et morte afficient ex vobis: et eritis odio omnibus propter nomen meum: et capillus de capite vestro non peribit. In patientia vestra possidebitis animas vestras.

Dicitur *Credo* per totam Oct.

Offertorium. Psal. 67, 36.

Mirabilis Deus in sanctis suis:

Deus Israël, ipse dabit virtutem, et fortitudinem plebi suae: benedictus Deus, alleluja.

Secreta.

**M**unera humilitatis nostrae Domine, quae pro sanctorum Martyrum tuorum Hermagorae et Fortunati gloriosa passione, et solennitate offerimus: quaesumus clementiam tuam, respicere dignare: et ipsorum intercessione, tam ad profectum vitae, quam animae, salutaria nobis consueta miseratione provenire concede. Per Dominum.

Pro S. Joanne.

**S**acris altaribus, Domine, hostias superpositas sanctus Joannes Abbas, quaesumus, in salutem nobis provenire deposcat. Per Dominum.

Communio. Sap. 3, 4, 5 et 6. Et si coram hominibus tormenta passi sunt, Deus tentavit eos: tamquam aurum in fornace probavit eos, et quasi holocausta accepit eos.

Postcommunio.

**S**umentes, Domine, caelestis dona mysterii, quaesumus; ut sanctorum Martyrum tuorum Hermagorae et Fortunati adjuvemur meritis, quorum solemnitatem celebramus. Per Dominum.

Pro S. Joanne.

**P**rotegat nos, Domine, cum tui perceptione sacramenti beatus Joannes Abbas, pro nobis intercedendo: ut et conversationis ejus experiamur insignia, et intercessionis percipiamus suffragia. Per Dominum.

Die 13 Julii

IN DEDICATIONE  
BASILICÆ S. Mariæ  
AQUILEJENSIS

Missæ Terribilis de Communi  
Dedicationis Ecclesiae.

Et fit Commem. S. Anacleti Pp.  
et M.

Oratio.

**G**regem tuum, Pastor æterne, placatus intende:

et per beatum Anacletum Martyrem tuum atque Summum Pontificem, perpetua protectione custodi; quem totius Ecclesiae praestitisti esse pastorem. Per Dominum.

Deinde fit Commem. Octavae Ss. Hermagorae et Fortunati ut supra die 12.

Pro S. Anacleto.

**O**blatis muneribus, quaesumus Domine, Ecclesiam tuam benignus illustra: ut, et gregis tui proficiat ubique successus, et grati fiant nomini tuo, te gubernante, pastores. Per Dominum.

Secreta pro Octava Ss. Mm. ut supra die 12.

Pro S. Anacleto.

**R**efectione sancta enutritam gubernata, quaesumus Domine, tuam placatus Ecclesiam: ut potenti moderatione directa, et incrementa libertatis accipiat et in religionis integritate persistat. Per Dominum.

Postcommunio pro Octava Ss. Mm. ut supra die 12.

Die 15 Julii

SS. REDEMPTORIS

Introitus. Isai. 61, 10.

**G**audens gaudebo in Domino, et exultabit anima mea in Deo meo: quia induit me vestimentis salutis: et indumento justitiae circumdedit me.

Psal. 88, 2. Misericordias Domini in aeternum cantabo: in generationem et generationem annuntiabo veritatem tuam in ore meo.

V. Gloria Patri.

Oratio

**D**eus, qui Unigenitum tuum mundi Redemptorem constituisti, et per eum, devicta morte, nos misericorditer ad vitam reparasti: concede; ut, haec beneficia recolentes, tibi perpetua caritate adhaerere, et ejusdem redemptionis fructum percipere mereamur. Per eundem Dominum.

Et fit commemor. S. Henrici Imperat. Conf.

Oratio.

**D**eus, qui hodierna die beatum Henricum Confessorem tuum e terreni culmine imperii ad regnum aeternum transtulisti: te supplices exoramus; ut, sicut illum, gratiae tuae ubertate praeventum, illecebras saeculi superare fecisti, ita nos facias, ejus imitatione, mundi hujus blandimenta vitare, et ad te puris mentibus pervenire. Per Dominum.

Lectio Epistolae beati Pauli Apostoli ad Ephesios.

Ephes. 1, 3-9.

**B**enedictus Deus et Pater Domini nostri Jesu Christi, qui benedixit nos in omni benedictione spirituali in caelestibus in Christo, sicut elegit nos in ipso ante mundi constitutionem, ut essemus sancti et immaculati in conspectu ejus in caritate. Qui praedestinavit nos in adoptionem filiorum per Jesum Christum in ipsum: secundum propositum voluntatis suae, in lau-

dem gloriae gratiae suae, in qua gratificavit nos in dilecto Filio suo. In quo habemus redemptionem per sanguinem ejus, remissionem peccatorum secundum divitias gratiae ejus quae superabundavit in nobis in omni sapientia, et prudentia: ut notum faceret nobis sacramentum voluntatis suae, secundum beneplacitum ejus, quod proposuit in eo.

Graduale Psal. 85, 9-10

Omnes gentes quascumque fecisti, venient, et adorabunt coram te, Domine: et glorificabunt nomen tuum.

℣. Quoniam magnus es tu, et faciens mirabilia: tu es Deus solus.

Alleluja, alleluja.

℣. Psal. 73, 12. Deus autem Rex noster ante saecula: operatus est salutem in medio terrae, Alleluja.

✠ Sequentia sancti Evangelii secundum Joannem  
Joann. 3, 13-18.

In illo tempore: Dixit Jesus Nicodemo: Nemo ascendit

in caelum, nisi qui descendit de caelo, Filius hominis, qui est in caelo. Et sicut Moyses exaltavit serpentem in deserto; ita exaltari oportet Filium hominis: ut omnis, qui credit in ipsum, non pereat, sed habeat vitam aeternam. Sic enim Deus dilexit mundum, ut Filium suum unigenitum daret: ut omnis, qui credit in eum, non pereat, sed habeat vitam aeternam. Non enim misit Deus Filium suum in mundum, ut judicet mundum, sed ut salvetur mundus per ipsum. Qui credit in eum, non judicatur: qui autem non credit, jam judicatus est: quia non credit in nomine unigeniti Filii Dei.

Credo.

Offertorium. Salus populi ego sum, dicit Dominus: de quacumque tribulatione clamaverint ad me exaudiam eos: et ero illorum Deus in perpetuum, alleluja.

Secreta.

Suscipe, quaesumus, Domine, oblatum redemp-

tionis aeternae mysterium: et praesta; ut unigeniti Filii tui gloriosis meritis intercedentibus, vivificet nos semper, et muniat. Per eundem Dominum.

Pro S. Henrico.

Laudis tibi, Domine, hostias immolamus in tuorum commemoratione Sanctorum: quibus nos et praesentibus exui malis confidimus, et futuris. Per Dominum.

Praefatio de Cruce. Qui salutem humani generis.

Communio. Psal. 106, 8. Confiteantur Domino misericordiae eius, et mirabilia ejus filiis hominum, alleluja.

Postcommunio.

Corporis tui sacri, ac pretiosi sanguinis, quo redempti sumus, Domine Jesu Christe, participes effecti: quaesumus; ut in nobis tua munera tuearis, atque a praesentis vitae malis ereptos, ad bona perducas sempiterna. Qui vivis.

Pro S. Henrico.

Refecti cibo potuque caelesti, Deus noster, te supplices exoramus: ut in cujus haec commemoratione percepimus, eius muniamur et precibus. Per Dominum.

Die 19 Julii

IN OCTAVA

Ss. HERMAGORAE *Ep.*  
et FORTUNATI *Diac. Mm.*

Missa ut in festo die 12. Et fit  
Commem. S. Vincenti a Paulo Conf.

Oratio.

Deus, qui ad evangelizandum pauperibus et ecclesiastici ordinis decorem promovendum, beatum Vincentium apostolica virtute roborasti; praesta, quaesumus; ut, cujus pia merita veneramus, virtutum quoque instruamur exemplis. Per Dominum.

Secreta.

Praesta nobis, quaesumus omnipotens Deus: ut nostrae humilitatis oblatio et pro tuorum tibi grata sit honore

Sanctorum, et nos corpore  
pariter et mente purificet.  
Per Dominum.

Postcommunio.

**Q**uaesumus, omnipotens  
Deus: ut, qui caelestia  
alimenta percepimus, interce-  
dente beato Vincentio Con-  
fessore tuo, per haec contra  
omnia adversa muniamur.  
Per Dominum.

Die 3 Septembris

Ss. EUPHEMIÆ,  
DOROTHEÆ, TECLÆ  
et ERASMÆ *Vv. et Mm.*

Introitus Psal. 17, 31.

**D**eus meus, impolluta via  
ejus: eloquia Domini  
igne examinata: protector est  
omnium sperantium in se.

Psal. *ibid.*, 2-3. Diligam te,  
Domine, fortitudo mea: Do-  
minus firmamentum meum,  
et refugium meum, et libe-  
rator meus.

ψ. Gloria Patri.

Oratio.

**D**a nobis, misericors, Deus,  
sanctis Virginibus et

Martyribus tuis Euphemia,  
Dorotea, Thecla et Erasma  
intercedentibus, caelestis gra-  
tiae abundantiam: ut earum  
passio celebrata praesentis vi-  
tae subsidium conferat, et  
aeternae. Per Dominum.

Lectio Epistolae beati Pauli  
Apostoli ad Corinthios.

2 Cor. 4, 6-11 et 16-17.

**F**ratres: Deus illuxit in cor-  
dibus nostris ad illumi-  
nationem scientiae claritatis  
Dei, in facie Christi Jesu.  
Habemus autem thesaurum  
istum in vasis fictilibus; ut  
sublimitas sit virtutis Dei, et  
non ex nobis. In omnibus  
tribulationem patimur, sed  
non angustiamur: aporiamur  
sed non destituimur: perse-  
cutionem patimur, sed non  
derelinquimur: dejicimur, sed  
non perimus: semper mortifi-  
cationem Jesu in corpore  
nostro circumferentes, ut et  
vita Jesu manifestetur in cor-  
poribus nostris. Semper enim  
nos, qui vivimus, in mortem  
tradimur propter Jesum: ut  
et vita Jesu manifestetur in

carne nostra mortali. Propter quod non deficimus; sed licet is, qui foris est, noster homo corrumpatur, tamen is, qui intus est, renovatur de die in diem. Id enim, quod in praesenti est momentaneum et leve tribulationis nostrae, supra modum in sublimitate aeternum gloriae pondus operatur in nobis.

Graduale, Psal. 43, 8-9  
 Salvasti enim nos, Deus, de affligentibus nos: et odientes nos confundisti.

Ψ. In Deo laudabimur tota die: et in nomine tuo confitebimur in saeculum.

Alleluja, alleluja.

Ψ. Apocal, 12, 11. Vicerunt draconem propter sanguinem Agni, et propter verbum testimonii sui.

Alleluja,

✠ Sequentia sancti Evangelii secundum Matthaeum.  
 Matth. 25, 1-13.

In illo tempore; Dixit Jesus discipulis suis parabolam hanc: Simile erit regnum cae-

lorum decem virginibus: quae accipientes lampades suas exierunt obviam sponso et sponsae. Quinque autem ex eis erant fatuae, et quinque prudentes: sed quinque fatuae, acceptis lampadibus, non sumpserunt oleum secum: prudentes vero acceperunt oleum in vasis suis cum lampadibus. Moram autem faciente sponso dormitaverunt omnes et dormierunt. Media autem nocte clamor factus est: Ecce sponsus venit, exite obviam ei. Tunc surrexerunt omnes virgines illae et ornaverunt lampades suas. Fatuae autem sapientibus dixerunt; Date nobis de oleo vestro: quia lampades nostrae extinguuntur. Responderunt prudente, dicentes: Ne forte non sufficiat nobis, et vobis, ite potius ad vendentes, et emite vobis. Dum autem irent emere, venit sponsus: et quae paratae erant, intraverunt cum eo ad nuptias, et clausa est janua. Novissime vero veniunt et reliquae virgines, dicentes:

Domine, Domine, aperi nobis. At ille respondens, ait; Amen dico vobis, nescio vos. Vigilate itaque, quia nescitis diem, neque horam.

Offertorium. Ps. 88, 16-17, Domine, in lumine vultus tui ambulabunt, et in nomine tuo exultabunt tota die: et in justitia tua exaltabuntur.

Secreta.

Intende, quaesumus, Domine, munera altaribus tuis pro beatarum Virginum et Martyrum tuarum Euphemiae, Dorotheae, Theclae, et Erasmae honore proposita: ut, sicut per haec sacra mysteria illis gloriam contulisti, ita nobis indulgentiam largiaris. Per Dominum.

Communio. Matth. 25, 4 et 6. Prudentes virgines acceperunt oleum in vasis suis cum lampadibus: media autem nocte clamor factus est: Ecce sponsus venit, exite obviam ei.

Postcommunio.

Praesta nobis, quaesumus, Domine, intercedentibus

beatis Virginibus et Martyribus tuis Euphemia, Dorothea, Thecla et Erasma: ut, quod ore contingimus, pure mente capiamus. Per Dominum

## Die 7 Septembris S. ANASTASII

*Martyris*

Introitus Psal. 20, 2-3.

In virtute tua, Domine, laetabitur justus: et super salutare tuum exultabit vehementer: desiderium animae ejus tribuisti ei.

Psal. ibid., 4. Quoniam praevenisti eum in benedictionibus dulcedinis: posuisti in capite eius coronam de lapide pretioso.

ψ. Gloria Patri.

Oratio.

Praesta, quaesumus, omnipotens Deus: ut, qui beati Anastasii Martyris tui natalitia colimus, intercessione ejus, in tui nominis amore roboremur. Per Dominum.

Lectio libri Sapientiae.

Sap. 10, 10-14.

**J**ustum deduxit Dominus per vias rectas, et ostendit illi regnum Dei, et dedit illi scientiam sanctorum: honestavit illum in laboribus, et complevit labores illius. In fraude circumvenientium illum affuit illi, et honestum fecit illum. Custodivit illum ab inimicis, et a seductoribus tutavit illum, et certamen forte dedit illi ut vinceret, et sciret, quoniam omnium potentior est sapientia. Haec venditum justum non dereliquit, sed a peccatoribus liberavit eum: descenditque cum illo in foveam, et in vinculis non dereliquit illum, donec afferret illi sceptrum regni, et potentiam adversus eos, qui eum deprimebant: et mendaces ostendit, qui maculaverunt illum, et dedit illi claritatem aeternam, Dominus Deus noster.

Graduale. Psal. 111, 1-2  
Beatus vir, qui timet Dominum: in mandatis ejus cupit nimis.

*V.* Potens in terra erit se-

men ejus: generatio rectorum benedicetur.

Alleluja, alleluja.

*V.* Psal. 20, 4. Posuisti, Domine, super caput ejus coronam de lapide pretioso. Alleluja.

✠ *Sequentia sancti Evangelii secundum Matthaeum.*

Matth. 16, 24-27.

**I**n illo tempore: dixit Jesus discipulis suis: Si quis vult post me venire, abneget semetipsum, et tollat crucem suam, et sequatur me. Qui enim voluerit animam suam salvam facere, perdet eam: qui autem perdiderit animam suam propter me, inveniet eam. Quid enim prodest homini, si mundum universum lucretur, animae vero suae detrimentum patiatur? Aut quam dabit homo commutationem pro anima sua? Filius enim hominis venturus est in gloria Patris sui cum Angelis suis: et tunc reddet unicuique secundum opera ejus.

Offertorium. Psal. 8, 6-7.  
Gloria et honore coronasti eum: et constituisti eum super opera manuum tuarum, Domine.

Secreta.

**M**uneribus nostris, quaesumus, Domine, precibusque susceptis: et caelestibus nos munda mysteriis, et clementer exaudi. Per Dominum.

Communio. Matth. 16, 24.  
Qui vult venire post me, abneget semetipsum, et tollat crucem suam, et sequatur me.

Postcommunio.

**D**a, quaesumus, Domine Deus noster: ut, sicut tuorum commemoratione Sanctorum temporali gratulamur officio; ita perpetuo laetemur aspectu. Per Dominum.

**Sabbato ante Dominicam  
IV. Octobris**

**B. MARIAE VIRGINIS**  
*titulo* **GRATIARUM**

Introitus. Sedulius

**S**alve, sancta parens, enixa puerpera Regem: qui cae-

lum, terramque regit in saecula saeculorum.

Psal. 44, 2. Eructavit cor meum verbum bonum: dico ego opera mea Regi.

*V.* Gloria Patri.

Oratio.

**D**eus, qui fidelibus tuis beatam Mariam Virginem gratiarum tuarum ministram tribuisti, ejus nobis intercessionem concede ut a cunctis malis liberemur in terris, et aeternis gaudiis perfruamur in caelis. Per Dominum.

Lectio libri Sapientiae.

Prov. 8, 22-35.

**D**ominus possedit me in initio viarum, suarum antequam quidquam faceret a principio. Ab aeterno ordinata sum, et ex antiquis, antequam terra fieret. Nondum erant abyssi, et ego jam concepta eram: necdum fontes aquarum eruperant: necdum montes gravi mole constiterant: ante colles ego parturiebar: adhuc terram non fecerat, et flumina, et cardines orbis terrae. Quando prae-

parabat caelos, aderam: quando certa lege et gyro vallabat abyssos: quando aethera firmabat sursum, et librabat fontes aquarum: quando circumdabat mari terminum suum, et legem ponebat aquis, ne transirent fines suos: quando appendebat fundamenta terrae. Cum eo eram cuncta componens: et delectabar per singulos dies, ludens coram eo omni tempore: ludens in orbe terrarum: et deliciae meae esse cum filiis hominum. Nunc ergo, filii, audite me: Beati, qui custodiunt vias meas. Audite disciplinam, et estote sapientes, et nolite abjicere eam. Beatus homo, qui audit me, et qui vigilat ad fores meas quotidie, et observat ad postes ostii mei. Qui me invenerit, inveniet vitam, et hauriet salutem a Domino.

Graduale. Benedicta et venerabilis es, Virgo Maria: quae sine tactu pudoris inventa es Mater Salvatoris.

Ÿ. Virgo Dei Genitrix,

quem totus non capit orbis, in tua se clausit viscera factus homo.

Alleluja, alleluja.

Ÿ. Per te, Dei Genitrix, nobis est vita perdita data: quae de caelo suscepisti prolem et mundo genuisti Salvatorem. Alleluja.

✠ Sequentia sancti Evangelii secundum Lucam.

Luc. 10, 38-42.

In illo tempore: Intravit Jesus in quoddam castellum: et mulier quaedam Martha nomine, excepit illum in domum suam: et huic erat soror nomine Maria, quae etiam sedens secus pedes Domini, audiebat verbum illius. Martha autem satagebat circa frequens ministerium: quae stetit, et ait: Domine, non est tibi curae, quod soror mea reliquit me solam ministrare? dic ergo illi, ut me adjuvet. Et respondens, dixit illi Dominus: Martha, Martha, sollicita es, et turbaris erga plurima: porro unum

est necessarium. Maria optimam partem elegit, quae non auferetur ab ea.

Credo.

Offertorium. Jerem. 18, 20. Recordare, Virgo mater, in conspectu Dei, ut loquaris pro nobis bona, et ut avertat indignationem suam a nobis.

Secreta.

**S**anctifica, Domine, quaesumus, oblata libamina, et, beatæ Deiparae semperque Virginis Mariae saluberrima intercessione, nobis salutaria fore concede. Per eundem Dominum.

Praefatio. Et te in Festivitate.

Communio. Regina mundi dignissima, Maria Virgo perpetua, intercede pro nostra pace et salute, quae genuisti Christum Dominum Salvatorem omnium.

Postcommunio.

**A**diuvet nos, quaesumus, Domine, gloriosae tuae Genitricis semperque Virginis Mariae intercessio veneranda;

ut quos perpetuis cumulavit beneficiis, a cunctis periculis absolutos sua faciat pietate concordēs. Qui vivis.

Die 30 Octobris

B. BENVENUTAE  
BOJANI *Virginis.*

Missæ Dilexisti, de Communi  
*Virginis.*

Oratio.

**G**ratiam nobis, Domine, poenitentiae, orationis et humilitatis infunde: ut beatæ Benvenutæ Virginis imitatione possimus et carnem mortificantes spiritu vivere, et caelestia jugiter cogitantes nosque despicientes in te solo Deo requiem et gloriam invenire. Per Dominum.

Die 16 Novembris  
IN DEDICATIONE  
OMNIUM ECCLES.  
CONSECRAT. Archid.

(*excepta Metropolitana.*)

Missæ Terribilis est, de Communi Dedicat. Ecclesiae, et dicit. Credo per totam Octavam.

Die 23 Novembris  
IN OCTAVA DEDICA-  
TIONIS OMNIUM  
ECCL. CONSECRAT.

(*excepta Metropolitana*).

Missa ut in Festo.

Et fit Commem. S. Clementis I.  
Pp. et Mart. et S. Felicitatis Mart.  
ut in Missali hac die.

Die 24 Novembris  
S. CHRISOGONI

*Martyris.*

Missa In virtute, de Comuni  
unius Mart. non Pont.

Oratio.

**A**desto, Domine, supplica-  
tionibus nostris: ut, qui  
ex iniquitate nostra reos nos  
esse cognoscimus, beati Chry-  
sogoni Martyris tui interces-  
sione liberemur. Per Do-  
minum.

Et fit Commem. S. Joannis a  
Cruce Conf.

Oratio.

**D**eus, qui sanctum Joan-  
nem Confessorem tuum,  
perfectae sui abnegationis, et  
Crucis amatorem eximium  
effecisti: concede; ut, ejus  
imitationi jugiter inhaerentes,

gloriam assequamur aeter-  
nam. Per Dominum.

Secreta.

**O**blatis, quaesumus, Do-  
mine, placare muneri-  
bus: et, intercedente beato  
Chrysogono Martyre tuo, a  
cunctis nos defende periculis.  
Per Dominum.

Pro S. Joanne.

**L**audis tibi, Domine, hostias  
immolamus in tuorum  
commemoratione Sanctorum:  
quibus nos et praesentibus  
exui malis confidimus, et fu-  
turis. Per Dominum.

Postcommunio.

**T**ui, Domine, perceptione  
sacramenti, et a nostris  
mundemur occultis, et ab  
hostium liberemur insidiis.  
Per Dominum.

Pro S. Joanne.

**R**efecti cibo potuque cae-  
lesti, Deus noster, te  
supplices exoramus: ut in  
cujus haec commemoratione  
percepimus, ejus muniamur  
et precibus. Per Dominum.

Die 27 Novembris  
S. VALERIANI

*Ep. et Conf.*

Missa Sacerdotes tui, de Comuni Conf. Pontif.

Die 2 Decembris  
S. CHROMATII

*Ep. et Conf.*

Introitus. Psal. 131, 9-10.

Sacerdotes tui, Domine, induant justitiam, et sancti tui exultent: propter David servum tuum, non avertas faciem Christi tui.

Psal. ibid. 1. Memento, Domine, David: et omnis mansuetudinis ejus.

ψ. Gloria Patri.

Oratio.

Exaudi, quaesumus, Domine, preces nostras, quas in beati Chromatii Confessoris tui atque Pontificis solemnitate deferimus: et, qui tibi digne meruit famulari, ejus intercedentibus meritis, ab omnibus nos absolve peccatis. Per Dominum.

Et fit Commem. S. Bibianae Virg. et Mart.

Oratio.

Deus, omnium largitor bonorum, qui in famula tua Bibiana cum virginitatis flore martyrii palmam conjunxisti: mentes nostras ejus intercessione tibi caritate conjunge; ut, amotis periculis, praemia consequamur aeterna. Per Dominum.

Deinde, si Festum celebretur in Adventu, fit Commem. Ferae.

Lectio Epistolae beati Pauli Apostoli ad Hebraeos.

Hebr. 7, 23-37.

Fratres: Plures facti sunt sacerdotes, idcirco quod morte prohiberentur permanere: Jesus autem eo quod maneat in aeternum, sempiternum habet sacerdotium. Unde et salvare in perpetuum potest accedentes per semetipsum ad Deum: semper vivens ad interpellandum pro nobis. Talis enim decebat, ut nobis esset pontifex, sanctus, innocens, impollutus, segregatus a peccatoribus, et excelsior caelis factus: qui non habet necessitatem quo-

tidie, quemadmodum sacerdotes, prius pro suis delictis hostias offerre, deinde pro populi: hoc enim fecit semel, seipsum offerendo, Jesus Christus Dominus noster.

Graduale. Ps. 131, 16-17. Sacerdotes ejus induam salutari: et sancti ejus exultatione exultabunt.

V. Illuc producam cornu David: paravi lucernam Christo meo.

Alleluja, alleluja.

V. Psal. 109, 4. Juravit Dominus, et non poenitebit eum: Tu es sacerdos in aeternum, secundum ordinem Melchisedech. Alleluja.

✠ Sequentia sancti Evangelii secundum Matthaeum.

Matth. 5, 13-19.

In illo tempore: Dixit Jesus discipulis suis: Vos estis sal terrae. Quod si sal evanuerit, in quo salietur? ad nihilum valet ultra, nisi ut mittatur foras, et conculcetur ab hominibus. Vos estis lux mundi. Non potest civitas

abscondi supra montem posita. Neque accendunt lucernam, et ponunt eam sub modio, sed super candelabrum, ut luceat omnibus qui in domo sunt. Sic luceat lux vestra coram hominibus, ut videant opera vestra bona, et glorificent Patrem vestrum, qui in caelis est. Nolite putare, quoniam veni solvere legem, aut prophetas: non veni solvere, sed adimplere. Amen quippe dico vobis, donec transeat caelum et terra, jota unum, aut unus apex non praeteribit a lege, donec omnia fiant. Qui ergo solverit unum de mandatis istis minimis, et docuerit sic homines, minimus vocabitur in regno caelorum: qui autem fecerit, et docuerit, hic magnus vocabitur in regno caelorum.

Offertorium. Psal. 88, 25. Veritas mea, et misericordia mea cum ipso: et in nomine meo exaltabitur cornu ejus.

Secreta.

Sancti Chromatii Confessoris tui atque Pontificis,

quaesumus, Domine, annua solemnitas pietati tuae nos reddat acceptos: ut, per haec piaae placationis officia, et illum beata retributio comitetur, et nobis gratiae tuae dona conciliet. Per Dominum.

Pro S. Bibiana.

**H**ostias tibi, Domine beatae Bibianae Virginis et Martyris tuae dicatas meritis, benignus assume: et ad perpetuum nobis tribue provenire subsidium. Per Dominum.

Deinde, in Adventu, Commem. Feriae.

Communio. Matth. 24, 46-47. Beatus servus, quem, cum venerit dominus, invenerit vigilantem: amen dico vobis, super omnia bona sua constituet eum.

Postcommunio.

**D**eus, fidelium remunerator animarum: praesta; ut beati Chromatii Confessoris tui atque Pontificis, cujus venerandam celebramus festivitatem, precibus indulgen-

tiam consequamur. Per Dominum.

Pro S. Bibiana.

**D**ivini muneris largitate satiati, quaesumus, Domine Deus noster: ut, intercedente beata Bibiana Virgine et Martyre tua, in ejus semper participatione vivamus. Per Dominum.

Deinde, in Adventu, Commem. Feriae.

## Die 30 Decembris S. ANASTASIAE

*Martyris.*

Missa *Me expectaverunt, de Communi Martyrum non Virginum.*

Oratio

**O**mnipotens sempiterne Deus, qui beatam Anastasiam Martyrem tuam in flammis tibi canentem glorioso coronasti triumpho; concede nos, eius intercessione, caritatis igne ita incendi in terris, ut in caelis tuas laudes perpetuo canere mereamur. Per Dominum.

Et fit Commem. Octavae Nativ. Domini.

## Oratio.

**C**oncede, quaesumus, omnipotens Deus: ut nos Unigeniti tui nova per carnem Nativitas liberet; quos sub peccati jugo vetusta servitus tenet. Per eundem Dominum.

## Secreta.

**A**ccipe, quaesumus, Domine, munera dignanter oblata: et, beatæ Anastasiae Martyris tuæ suffragantibus meritis, ad nostræ salutis auxilium provenire concede. Per Dominum.

## Pro Octava Nativ. Dom.

**O**blata, Domine munera, nova Unigeniti tui Na-

tivitate sanctifica; nosque a peccatorum nostrorum maculis emunda. Per eundem Dominum.

## Postcommunio.

**S**atiasti, Domine, familiam tuam muneribus sacris: ejus, quaesumus, semper interventione nos refove, cujus solemnia celebramus. Per Dominum.

## Pro Octava Nativ. Domini.

**P**raesta, quaesumus, omnipotens Deus: ut natus hodie Salvator mundi, sicut divinae nobis generationis est auctor; ita et immortalitatis sit ipse largitor: Qui tecum.



# INDEX

## JANUARIUS

- 2 S. Zoili Conf. . . . . Pag. 3  
 14 B. Odorici Matthiussi Conf. » ibi  
 19 S. Paulini Patriarch. Aq.  
 Conf. . . . . » 6

## FEBRUARIUS

- 8 S. Juventii Ep. Conf. . . . . Pag. 8

## MARTIUS

- 3 S. Anselmi Abb. . . . . Pag. 9  
 16 S. Hilarii Episc. et Tatiani  
 Diac. Mm. . . . . » ibi  
 25 IN ANNUNTIATIONE B.  
 MARIAE V. . . . . » 9

## APRILIS

- 1 In Octava Annuntiationis  
 B. Mariae v. . . . . Pag. 10  
 18 IN DEDICATIONE S. ME-  
 TROPOL. ECCL. UTINEN. » ibi  
 23 B. Helenae de Valentinis  
 Vid. . . . . » ibi  
 25 In Octava Dedicacionis S.  
 Metropol. Eccl. Utinen. . . » 11

## MAJUS

- 31 Ss. Cantiani, Cantii, Can-  
 tianillae ac Proti Mm. . . . . Pag. 12

## JUNIUS

- 6 B. Bertrandi Patriarch. A-  
 quil. Conf. . . . . Pag. 14  
 15 Ss. Felicis et Fortunati Mm. » 15  
 17 Ss. Cyriacae et Muscae Vir-  
 ginum et Martyrum . . . » 18  
 22 S. Nicetae Episc. Conf. . . » 20

## JULIUS

- 3 S. Heliodori Episc. Conf. . . . . Pag. 21  
 12 Ss. HERMAGORAE Proto-  
 episcopi Aquil., et FORTU-  
 NATI Diac. Mm. . . . . » 23  
 13 In Dedicacione Basilicae S.  
 Mariae Aquil. . . . . » 26  
 15 SS. REDEMPTORIS . . . . . » 27  
 19 In Octava Ss. Hermagorae  
 et Fortunati Mm. . . . . » 29

## SEPTEMBER

- 3 Ss. Euphemiae, Dorotheae,  
 Theclae et Erasmae Vv. et  
 Mm. . . . . Pag. 30  
 7 S. Anastasii M. . . . . » 32

## OCTOBER

- Sabbato ante Dominicam IV*  
*Octobris B. M. V. titulo*  
 GRATIARUM . . . . . Pag. 34  
 30 B. Benvenutae Bojani V. . . » 36

## NOVEMBER

- 16 IN DEDICAT. OMNIUM  
 ECCLES. CONSECRAT.  
 ARCHIDIOEC. . . . . Pag. 36  
 23 In Octava Dedic. earumd.  
 Eccl. . . . . » 37  
 24 S. Chrysogoni M. . . . . » ibi  
 27 S. Valeriani Ep. Conf. . . . » 38

## DECEMBER

- 2 S. Chromatii Ep. Conf. . . . . Pag. 38  
 30 S. Anastasiae M. . . . . » 40